

ФИДОЙИ БЎЛГИНГ КЕЛАДИ

Публицистика

Ўзбекистонимиз ўз Давлат мустақиллигини қўлга киритганига йигирма олти йил тўляпти.

Йигирма олти йил!

Кимларгадир, айтайлик, ёши улуғ ёки ўрта ёшлилар учун ҳаётининг бир бўлаги. Кимларгадир, айтайлик, навқирон авлодга бутун бир умр! Нима бўлганда ҳам у ҳаётимиз. Истиқлолнинг дастлабки йилларидаги мураккабликларни, қийин синовларни ва ниҳоят нурли, фарахбахш кунларни кўришни насиб этказган ҳаётимиз.

Президентимизнинг куни кеча эълон қилинган “Ўзбекистон Республикаси Давлат мустақиллигининг йигирма олти йиллик байрамига тайёргарлик кўриш ва уни ўтказиш тўғрисида” ги қарорини ўқиб туриб Мустақиллигимизнинг нақадар буюк неъмат эканлигини, унинг улуғвор мазмун моҳиятини яна бир бор чуқур ҳис этдим.

Мамлакатимиз ўз тараққиётининг янги босқичига қадам қўйди.

2017 йил “Халқ билан мулоқот ва инсон манфаатлари йили” деб эълон қилинди.

“Халқ давлат идораларига эмас, балки давлат идоралари халқимизга хизмат қилиши керак” деган тамойилга жойларда амал қилинмоқда.

Бу борада давлатимиз раҳбари Шавкат Миромонович Мирзиёевнинг ўзлари ибрат намунасини кўрсатаётганларига бутун Ўзбекистон гувоҳ бўлиб турибди.

Яқинда Президентимизнинг Фарғонага ташрифи бўлиб ўтди. Тўғриси айтсам бу ташрифни орзиқиб кутдик. Негаки сўнгги пайтларда мамлакатимиз ижтимоий-иқтисодий, сиёсий ҳаётида бекиёс ўзгаришлар содир бўляпти. У киши қаерга борса, халқаро миқёсдаги сафарларику тарихий воқеага айланыпти, қайси вилоятда бўлса ўша вилоятнинг тараққиёти бирданига беш-ўн хатто ундан ҳам зиёдроқ йилларга олдинга кетаётганига гувоҳ бўляпмиз.

Ўзгаришлар, юксалишлар, ислохатлар... Булар бутун мамлакат бўйлаб ҳаётнинг ҳар бир жабҳасида содир бўлаётганини ўз кўзимиз билан кўриб турибмиз.

Президентимизнинг вилоят бўйлаб сафари давомида жойлардаги учрашувлар, одамлар билан мулоқотларда билдирган фикрлари, таклифлари, ободончилик, фаровонликни оширишга қаратилган топшириқлари асносида Фарғонанинг узоқ йиллик, аммо яқин даврларда бажарилиши мумкин бўлган истиқболлини кўргандай бўлдик.

Назаримда ҳар бир кишида, у тадбиркор бўладими, фермер, ипакчи ё хунарманд бўладими, тиббиёт ходими ё инвестор бўладими, ҳаммага ижодкорлик, яратувчанлик, фидойилик фазилати юққандай. Асаларичи Шерали Суяркулов мўъжиза яратяпти, халқимизни асал билан тўйдириб, хорижга ҳам неча-неча ўн миллионлаб долларлик маҳсулот чиқараман деб турибди. Анорчи Мастура Сайфиддинова яқин икки – уч йилда икки минг гектар боғзор ташкил этиб 30 минг тонна анор етказиб бериш режасини далиллаб гапирди. Шукурулла Суяркулов эса Германиядан икки минг бош мол келтираман, наслдор эчкичиликка асос соламан, деб турибди. Қўқонлик тиббиёт ходими хадемай энг мураккаб жарроҳлик амалиёти ўзимизда амалга оширилади, дея ишонч билдирыпти. Олтиариқлик фермер Лолахон Муродова эса ғайратини ичига сиғдиролмай яна комбайн рулига ўтирди. Ҳаётимизга кириб келган янги техникалар афзалликлари ҳақида жўшиб гапириб – Бундай юртга хизмат қилиб чарчамайман дейди.

Халқимиз меҳнаткашда. Марказий Фарғона ўзлаштирилди. Лекин бу ерларда ишлаётганлар кутилган самарани кўришяптими? Марказий Фарғонадан пахтани оламиз деди Шавкат Миромонович. Мевазор боғ-роғларга айлантирамиз. Бодомзор, pistaзор, ёнғоқзорларга айлантирамиз. Одамлар учун арзон лойиҳадаги уйлар қуриб берамиз. Бу ишлар яқин уч-беш йилда амалга оширилади. Бу сўзларни Юртбошимиз айтяпти. Демак хадемай Ёзёвон, ёзи ёмон деган

жойлар жаннатмонанд масканга айланади. Марказий Фарғона шундай қиёфа касб этар экан азалдан гўзал деб аталган бутун Фарғонамиз эртага қандай қиёфа касб этишини кўз олдингизга келтириб кўрингга.

Қисқаси Шавкат Миромонович вилоятимизнинг қаерида бўлмасин дилинг ойнасини равшанлантирадиган фикрлар ўртага ташланди. Қўқон шаҳри мусиқали драма театри артистлари билан учрашув чоғидаги суҳбатда бу ерда пойтахтдаги давлат санъат ва маданият институтининг филиалини очиш ҳақидаги фикрлари қалби санъатга ташна Хўқанди латиф ёшларини қанчалик қувонтирган бўлса, Марғилонда атоқли адиб Эркин Воҳидов номидаги боғ “нафосат гулшани” нинг атласу, адраслар билан нақшланган патқалам янглиқ хайратомуз лойихаси хусусидаги сўзлари адабиёт мухлисларини шунчалик севинтирди.

Президентимиз “Шукур давлат” фермер хўжалиги фаолияти билан танишгач, қорабайир зотдор отлар етиштириш ҳақида фикр юритдилар.

Бу сўзлар қадим бир ривоятни ёдга солади. Буюк Чиннинг Хан сулоласи вакили улуғвор эл – Довон сари (ўша пайтлар Фарғона музофоти шундай аталгани кўпчиликка аён) йўл олади – сафар чоғи йўлдан чалғиб дашти қипчоқ қароқчилари қўлига тушади. Элчини ҳам, унинг ҳамроҳларини ҳам тунашиб ўзларини қаролга айлантиришади. Етти йил чўпонлик қилади. То унга қароқчибошининг қизи Рухшонанинг эътибори тушмагунча. Рухшона тутқуннинг кимлиги, қаёқдан келганлиги, мақсади нелиги билан қизиқади.

Исмим У Цин (кейинчалик бу сайёҳ қадим Фарғона, унинг қорабайирлари ҳақида ёзма манбалар қолдирган.) Довонга йўлланган элчиман, – дейди тутқин. Хукмдоримнинг азмини етказмоқчи эдим.

Довон қандайин юртки буюк Чин хукмдорининг эътиборини тортган бўлса, – сўрайди Рухшона.

Унинг Чинникидан майинроқ ипаклари, шамолдек учқур қорабайирлари донғи бизгача етган. Бундайин омилкор эл билан дўстлик риштасини боғласак фойдалидир деб ҳисоблайди, хукмдорим.

Рухшона оқила қиз эди. Тутқунни озод қилиш йўлини излайди.

Зора сен сабаб бўлиб Чину Довон сари йўл очилса. У эзгулик йўли бўлиб, дашти қипчоқ қароқчиларини ҳам ғараз ниятларидан қайтарса. Инсофга келтирса, – дея Довон сари кузатиб қўяди.

Ангрен - Поп тез юрар поезд йўли очилган кезлари ёдимга келган эди, бу ривоят. Бугун уни яна эслаб турибман.

Мана, Президентимиз бундан икки минг йил нарида ҳам Довон (Фарғона деб тушунинг) доврўғини таратган қорабайирлар ҳақида фикр юритяпти.

Наҳотки Фарғона заминида учқур қорабайирлар туёғидан чиқадиган дупурлари, сер хосият бу жонзоднинг мардонавор кишнашлари яна юртимиз доврўғини таратиб турса. Яна Президентимиз айтганидек Марғилон-Фарғона-Қўқон оралиғидаги йўлларда қорабайирларнинг виқор тўкиб арава тортишларини кўз олдингизга келтириб кўрингга. Эртаксимон орзуларимизнинг рўёбга чиқаётгани далили эмасми булар.

Мустақиллигимизнинг йигирма олти йиллик байрами “Фидойинг бўлғаймиз сени, Ўзбекистон!” деган эзгу ғоя асосида ўтадиган бўлди. Юртини обод, халқини бой, мамлакатини буюк қиладиган бундай ғояни қадрламай, буюк Ўзбекистонимизни севмай бўладими?! Унинг ҳар бир жабҳасига, лахзасига фидойи бўлгинг келади.